

Lider di e team negociado cu Citgo mr. drs. Richard Arends

“E negociacion tabata uno compleho unda hopi asunto mester a wordo atendi”

LIDER general di e team negociado entre e partidonan cu a yega na un acuerdo cu Citgo Petroleum Corporation, mr drs. Richard Arends, pa lunanan largo tabata involvi den e negociacionnan unda tabatin un bay bin di discusion y proposicion, riba dlanan liber, den weekend y den oranan laat di anochi.

E grupo di Aruba tabata kier a logra e miho deal posibel pa Aruba.

A logra yega na un bon deal y awor e ultimo detayenan ta wordo poni den nan lugá p’e acuerdo por bay Parlamento y despues cana su caminda na e departamentonan concerni pa e leyman nobo pa loke ta operacion di Citgo keda cla pa e facilidad por cuminsa draai dia 1 di augustus.

Sr. Arends a splica cu loke a tuma hopi tempo ta e hecho cu aki ta trata di un transicion comercial.

“Loke nos a yega na dj’e ta un situacion win-win. Ambos partido a saca lo miho di dj’e. Cualquier exigencia di Gobierno tabata wordo scrutina si e tabatin ‘business sense’ pa Citgo y di otro banda t’asina cu loke ta bon pa Citgo no necesariamente ta loke Gobierno ta desea y asina e discusionnan tabata bay.

Pero, mi ta kere cu riba tur e puntonan y sigur esnan importante manera di labor, e parti di e balor agrega pa nos economia, pero tambe e parti ‘berde’ di uzo di gas (LNG) etc. a yega na un acuerdo.

E

tabata un asunto como compleho, tabatin hopi asunto cu mester a keda regla pa por a yega na un acuerdo final”, segun sr. Arends ta splica.

Un di e condicionnan cu Gobierno a pone ta cu for di prome dia di operacion ta start cu gas. “E prome bari di petroleo cu ta bay wordo refina na e facilidad di Aruba lo sosode pa medio di gas natural”.

Mirando e situacion rond mundo unda prijsnan di petroleo ta bahando e pregunta cu ta surgi ta con Citgo ta bay haci ganashi si e tendencia aki sigui asina.

“Ta djis pasobra cu e no ta bira un refinaria cu ta bay haci ganashi”, Richard Arends su contesta firme tabata.

Di henter e cadena Citgo-PDVSA e facilidad na Aruba ta bay bira un ‘upgrader’ unda cu Aruba lo refina crudo extra pisa di Venezuela. E refinaria di Aruba den pasado a wordo construi

specialmente pa refina e tipo di crudo aki. Loke cu e upgrader na Aruba ta bay haci ta refina e crudo ey y haci di dj’e un crudo sintetico y e ultimo ey ta wordo bendi na otro refinarianan na un prijs entre 11 pa 14 dollar, mas abou cu e prijs di crudo cu ta awor na mas o menos 26 dollar.

Obviamente ta asina cu mas e prijs di petroleo subi, mas ganashi e facilidad na Aruba lo haci. Pero asina mes cu awor tin un prijs mundial di petroleo bastante abou, e deal ta ‘makes perfect business sense’ pa e cadena aki.”

Durante e ultimo shete añanan cu ta tras si lomba e refinaria na Sero Colorado tabatin su ups and downs. Asina el a cera dos biaha y mientras tabata busca un comprador, a resulta cu ningun por a cubri e margennan cu pa un operador di un refinaria tabata negativo.

“E tempo ey caba Aruba a wordo aserca pa PDVSA y gobierno na su turno a aserca EcoPetrol, PEMEX y PetroChina a aserca nos.

Pa loke ta PDVSA nan a hasta bin Aruba entre un Pasco cu Aña Nobo pa papia, pero nan no tabatin e necesidad cu nan tin aworaki. E situacion a cambia tambe ya cu e facilidad ta bay wordo uza como un upgrader.

Esaki no ta mas ni menos cu un refinaria, solamente e configuracion ta diferente, e cantidad di empleo cu e ta genera ta mescos y te hasta por ta mas riba cierto asuntonan.

E nomber no ta haci’e menos di loke e ta. Nos ta keda yam’e ‘refinaria’”, sr. Arends a finalisa bisando.

